



14. august 2021

UPA 2022/62

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiuppara:

Namminersorlutik Oqartussat suliffeqarfiutaanni aktieselskabini siulersuisuinut siulittaasunik toqqaasarneq pillugu oqallinnissamik siunnersuut. (Inatsisartunut ilaasortaq Jens Napätk', Naleraq)

Kalaallit Nunaanni Namminersorlutik Oqartussat aamma pisortat suliffeqarfiutaanni aktieselskabini anginerni, akunnattuni mikinernilu kisermaassilluni piginnituuvoo¹. Kisermaassilluni piginnittuunerata periarfissippiaa nammineerluni suliffeqarfintta taakkunani siulersuisunut siulittaasussanik toqqaasarsinnaanera. Isumanga naapertorlugu nunarput ukiut ingerlanerini ilinniarluarsimallutik ilinniakkaminnik naammassinnittartunik, inuussutissarsiutitigut misilittagaqarlualersimasunik kiisalu suliffeqarfintti siulersuisuni suleqataanermik misilittagalinnik, uagut ingerlatseqatigiiffiutitsinni siulittaasutut sulinissamut piukkunnartunik toqqangassaqaarlualersimassasoq qularinngilara.

Tamatumannga ilanngullugu puigussanngilarput nunami maani inunngorsimasut alliartorsimasullu nunamut matumunnga tunngatillugu ilisimasaat, inuiaqatigiit aaqqissunneqarnerannut ineriartornerannillu ilisimasaat, minnerunngitsumillu kulturimut oqaatsinullu tunngatillugu ilisimasaat, avataaneersut pigiliussinnaangisaat nunaqavissunit pigineqartarmata. Ilisimasat taamaattut suliffeqarfintti siulittaasunik pissutsit pitsaanerpaat aallaavigalugit nalilersuisinnaanermik periarfissiisarput, unammillernartunillu nalaataqarnermi suliffeqarfimmuit inuiaqatigiinnullu naapertuuttunik aaqqiissutissanik tikkuussiniarnernut tamakku qularinngilara iluaquitaasartussaasut.

Taavami sooq ilinniarluarsimallutik ilinniakkaminnik naammassinnittartut atorfimmullu piukkunnarluartut annertunerusumik atornianngilagut?

Pissutsit taamaanneri naapertuutinngilluinnarput, tassami 1979-iminngaanniilli Namminersorneruneq eqqunneqarmalli kalaaleq nunami ineriartoranut isiginnaartussiaannartut avataanut inissisimajuarsimanerat annertuaallaartoq, akuersarneqarsinnaanngitsoq, Naleraq isumaqarpoq. Ineriartornerlu tamanna avataaneersunit suli maannamut aqunneqarpoq. Tunngavilersorneq taamaattoq ammip qalipaataanik imaluunniit nuna allamiunik immikkoortsiniarnermik siunertaqanngilaq, paarlattuanillu Naleraq isumaqarpoq piffissanngorsimasoq nunap inui aallaavigalugit nuna manna piorsarneqarlunilu ineriartortinneqalissasoq, aatsaat taamaaliornikkut tamakkiisumik nunap inui aallavigalugit sulinerput pimoorunneqarnerulissasoq isumaqarpugut.

Suliffeqarfiit Namminersorlutik Oqartussanit pigineqartut inuiaqatigiinnut pingaarutilerujussuarnik suliaqartarput soorlu attaveqaqatigiinnermut pilersuinermullu tunngatillugu. Suliffeqarfiit katillugit 3.500-

¹ Royal Grenland A/S, Royal Arctic Line A/S, Visit Greenland A/S, Tele Greenland A/S, Great Greenland A/S, Boligselskabet INI A/S, NunaOil A/S, KNI A/S, Sikuki Nuuk Harbour A/S, Greenland Holding A/S, Illuut A/S, Kalaallit Airports A/S, air Greenland A/S, Oil Spill Response A/S.



Naleraq

inik sulisoqarput, amerlanerpaartaallu Kalaallit Nunaanni sulipput. Suliffeqarfiiut Namminersorlutik Oqartussanit pigineqartut Kalaallit Nunaata ineriartornerani pingaarutilerujussuartut inissisimapput.

Tamatumunnga ilanngullugu erseqqissassavarput nunatta aningaasat kaaviaartitaat aatsaat annertusarneqarsinnaammata suliffeqarfinni aktieselskabini Namminersorlutik Oqartussanit pigineqartuni siulersuisuni siulittaasut amerlanersaat kalaallinik inuttalersorneqarpata. Oqallilluarnissassinnik kissaappassi.